



Senin, 7 Oktober 2024

Ogen: Sakaria 13:7-9



Iuji Bagi Emas



Adi Tuhan enggo erbelas, ise ngasup ngolangisa? Nabi Sakaria nuriken kai ate Tuhan siibahanNa nandangi kesusuren Daud ras kalak Jerusalem. Ipake Tuhan me pagi pedang lako engkernepken permakan biri-biriNa. Adi permakan e ibunuh marpar merap me biri-birina. Permakan e labo terjeng si erdahin i bas rumah pertoton tapi pe pemimpin-pemimpin masyarakat. Situasi si jadi paksa e pemimpin-pemimpin pe enggo nilah i bas pengajaren Dibata nari. Pemimpin e enggo enterem si nambah berhala-berhala bangsa sideban. Pemimpin e biasana jadi ikuten, e maka tupung pemimpinna nambah berhala, enterem bangsa Israel si ngikutkensa.

Perbahanen pemimpin-pemimpin e erbahan ceda pusuh Tuhan. Lanai terbahanSa sinik, e maka kerina pemimpin e ateNa ibunuhNa, gelah lanai lit simabai bangsa e papak nadingken Dibata. Kenca bage dua pertelu bangsa e pe ikernepken alu pedang. Nuduhkan maka kegeluhen bangsaNa lit i bas pengaturen Dibata. Ise pe labo lit si ngasup ngolang-ngolangisa kai si ikataken Dibata e. Tujunna maka bage ibahan Dibata gelah bangsa e ngidah kuasaNa si mbisa, si labo lit tandingenna. Alu bage mulihken ia ku Dibata, tadingkenna kerina gana-gana si isembah bangsa sekelewetna.

Lit sepertelu nari perpulungen si sisa. Bage kin si irencanakan Dibata gelah lit denga bangsaNa si tading guna naksiken kuasa Dibata man sekelewetna. Si sisa e isepuh Dibata kinitekenna desken emas, gelah teridah kinitekenna e murni entah lahang. Isalihken Dibata ukurna guna reh ndahi Tuhan arah pertoton. Itundalkenna gana-gana si labo lit kusana. Ijadiken Dibata ia bangsaNa janah iakuina maka Tuhan e kap Dibatana.